

EQUIPONAN DI CONTRATISTANAN LOCAL SACA DI TERENO DI COASTAL




Diario
E MATUTINO DI ARUBA

DIALUNA 7 JANUARI 1991

ABONADO PA LUNA 19,00 FLS**PA EJEMPLAR 0,80 AÑA10/NO.3260

San Nicolas a eligi su Reina Infantil



ORANJESTAD (AAN): Ayer anochi a tuma lugar e prome eleccion di un Reina Infantil pa Carnaval 1991, y esaki a toca honor pa San Nicolas.

Nada menos cu ocho candidata a presenta riba escenario di Bonaire Club, cual sorprendentemente tabata yen di fanatico y mayornan cu a bay presencia e eleccion.

E reinanan mes a presenta na un forma bunita, y hopi di nan tabata muestra con contento y alegre nan ta riba escenario.

Despues a yega momento di eleccion y coronacion. Por a sinti e tension entre esnan presente mientras nan tabata wardando pa saca e prome finalista.

Esaki a keda den persona di e simpatica Daphney Romero. Publico e ora a aplaudi y tur hende tabata contento cu Daphney, kende tin su Barbie como hobby, y su deseo ora di bira grandi ta pa bira un Stewardess.

Despues atrobe tension, pa

haya sa kende ta Reina Infantil di San Nicolas. Esaki a keda den persona di Milangela Trinidad, kende tin bailamento como hobby, y tambe hunga cu su Barbie y modela. Su deseo ta pa bira modelo ora e bira grandi.

E coronacion tabata den man di Dr. Derwin Alders, y publico a keda satisfecho cu e anochi. Sin duda alguno, pa tempran cu Carnaval ta, San Nicolas a demostra cu e ta keto bay e number un.

Proyecto di Golfcourse na Sasaki bayendo bon

ORANJESTAD (AAN): Ayera ta net cuatro luna pasa cu e proyecto di Golfcourse na e cruzada Sasaki/Bubali a cuminsa cu e ceremonia di groundbreaking. E proyecto aki ta di e empresario Jozeph Brito Mendez.

Segun DIARIO a comprende, Mendez a inverti 1.7 millon dollar den e proyecto aki y ta ser spera cu den cuatro pa cinco aña e ta completa y cla pa drenta den operacion.

Ayera durante e accidente cu a sosode na e cruzada

DIARIO a tira un vista na e lugar di Golfcourse y mester bisa cu den cuatro luna di tempo ta masha hopi progreso a ser registra.

E proyecto ta ser financiado pa Brito Mendez y Gobierno no tin parti den e financiamiento aki.

Koningstraat ta menaza cu protesta

ORANJESTAD (AAN): Habitantenan di Koningstraat si a pasa un Aña Nobo malo. Un riool cu a plug a inunda e barrio cu mal holor. Yamadanan na Gobierno a keda sin ricibi atencion, y awor e habitantenan ta menaza cu protesta!

American Airlines a stop su vuelo pa Curaçao

ORANJESTAD (AAN): Un noticia hopi sorprendente cu DIARIO a ricibi den fin di siman ta encuanto e decision di American Airlines pa pospone su vuelo for di San Juan pa Curaçao.

Mescos cu Aruba, nos hermana isla tambe tin un conexion aereo di American Airlines cu ta pasa via e "San Juan Hub", cu a bira famoso pa e aerolinea aki.

Cancelacion di e vuelonan pa Curaçao a cay manera un sorpresa cerca gobernantenan na e isla, y mesora autoridadnan di turismo a mobilisa pa haya sa kico ta pasando.

E motibo mes pakico American Airlines a stop cu e vuelonan no ta conoci. Pero un fuente a indica na DIARIO cu posiblemente e prijs halto di combustible

por a hunga un rol pa esaki.

Ademas di esey, e posibilidad ta existi cu e vuelonan aki lo ta hopi bashi, y na un dado momento American a dicidi cu no ta rendable pa sigui cu e vuelonan.

E bon noticia ta cu e vuelonan di San Juan pa Aruba SI ta sigui. Nos tur sa cu American ta usa un Airbus 300 pa e vuelo di tur dia pa Aruba, y tur hende sa cu e ruta ta uno hopi gusta.

Ta ser spera cu American lo anuncia pronto e motibo pa cancelacion di su vuelo pa Curaçao for di San Juan.